

---

## HUGUES DE LA BACHELERIE.

---

### I.

**S**ES totz enjans e ses falsa entendensa,  
Aissi cum selh cuy amors a conquis,  
Serai totz temps francx e leyals e fis  
Vas vos, dompna, en fach et en parvensa;  
E non ai cor ni poder que m n'estraya,  
Ans vos serai en perdo fis amans,  
Q' huey vos am mais no fazia er dos tans;  
Et a totz jorns dobla m la voluntatz,  
Qu'anc no fon drutz mielhs ames desamatz.

Bona dompna, ses vos non ai guirensa;  
Tan finamen vos am e us sui aclis  
Que, quan no us vey, mon cor planh e languis,  
E quan vos vey, no us aus dir per temensa  
L'amor qu'ie us port, bona dompna veraya;  
E, si m faitz mal en re, no'n sui clamans,  
Per qu'ieu vos prec, dompna, no m sia dans;  
Valha m'ab vos merces e pietatz,  
Essenhamens e franqueza e bontatz.

Ben dey amar ses neguna fallensa,  
Quar tot quant es en las outras devis,  
Sens e beutatz, gent parlar e francx ris,

Essenhamens, saber e conoyssensa,  
E tot aquo qu'a pretz verays s'asaya  
Vey qu'es en vos, bona dompna e prezans,  
Per qu'ieu faray tos temps vostres comans,  
Que ja no y fos lo quartz ni la meytatz,  
Si us amer'ieu, quan aissi fui fadatz.

E non puesc far pus aspra penedensa,  
S'ie us am de cor e vos non abellis;  
Mas non pues mais, qu'amors m'en afortis,  
E m ditz q' hueymais seria recrezensa,  
E m mostra tan que qui d'amar s'asaya  
Coven que sia afortitz sos talans,  
E'n sofra en patz lo maltrag e'ls afans,  
E qu'ieu vos am sitot vos no m'amatz,  
Qu'hom recrezens er greu drutz apellatz.

S'encontra me gardatz vostra valensa  
Ni'l verai pretz que dieus a en vos mis,  
Mielhs mi fora, dompna, que ja no us vis,  
Qu'otra del mon no m platz ni no m'agensa;  
Mas una re m'en auci e m'esglaya,  
Quant ieu remir vostres faitz benestans  
E la valor qu'es tan richa e tan grans,  
No us auzi dir, dompna, merce m'aiatz,  
S'elh paratges no bays humilitatz.

.....

## II.

PER grazir la bona estrena  
D'amor que m ten en capdelh,  
E per aleujar ma pena  
Vuelh far alb' ab son novelh ;  
La nueg vei clara e serena,  
Et aug lo chan d'un auzelh  
En que mos mals se refrena,  
Don quier lo jorn et apelh.  
Dieus! qual enueg  
Mi fai la nueg,  
Per qu'ieu dezir l'alba.

Qu'ie us jur pels sans evangelis  
Que anc Andrieus de Paris,  
Floris, Tristans ni Amelis  
No foron d'amor tan fis ;  
Depus mon cor li doneris  
US PATER NOSTER NON DIS,  
Ans qu'ieu disses : QUI ES IN CELIS,  
Fon a lieys mos esperitz.  
Dieus! qual enueg  
Mi fai la nueg,  
Per qu'ieu dezir l'alba.

En mar, en plan, ni en roca,  
Non puesc ad amor gandar,  
Mais non creyrai gent badoca

Que m fasson de lieys partir;  
Qu' aissi m punh al cor e m toca,  
E m tolh manjar e dormir,  
Que, s' ieu era en Antioca,  
Ieu volri' ab lieys morir.

Dieus! qual enueg  
Mi fai la nueg,  
Per qu' ieu dezir l' alba.

Amors, ieu saupra gent tendre,  
E penre ors o laupart,  
O per far for castelh rendre;  
Mas vas vos non truep nulh art,  
Ni no m play ab vos contendre,  
Qu' aissi con ai maior part  
Sui pus volpilhs al defendre,  
E n' ai mil tans de regart.

Dieus! qual enueg  
Mi fai la nueg,  
Per qu' ieu dezir l' alba.